

開放文學 – 神鬼仙俠 – 東遊記 三 二仙華山傳道

一日，老君與宛邱在華山論道，忽清風一陣，吹入堂中。老君謂宛邱曰：“君知此風乎？”宛邱曰：“似有異人來此。”老君曰：“吾觀仙？李鐵拐將欲成道，今日之來，乃鐵拐同道也。”即命二童候於山下。二童甫至，忽見一人仙風道骨羽服，飄飄而來。二童趨近問曰：“君得非李先生乎？”李曰：“是也，君何以知我？”二童曰：“吾奉老君命，迎君於此。”先生暗喜曰：“老君知我，諒必於道有緣也。”乃向前行禮稱謝，遂同二童登老君之堂。但見老君在上，毫光照曜，景壘慶雲。肌膚綽約，似閨中之處子；精神充溢，猶襁褓之嬰兒。次觀宛邱，童顏鶴發，碧眼修眉，翩翩有道，意氣融融，保真氣象，真天上神人，非人間凡骨也。先生趨拜，二仙答禮命坐。先生再拜曰：“弟子山野鄙人，林泉末品，太泄欲求上達，精微未臻。來追覓仙蹤，仰祈覺悟，幸蒙不棄，得睹仙顏，誠夙世有緣，三生有幸。倘憫弟子齋宿之誠，問道之切，指迷大覺，則佩德殊深，感恩彌厚。方將拜跪，不勝永懷之至，敢望坐乎？”老子曰：“居，吾與汝：至道之精，杳杳冥冥；至道之極，昏昏默默。無道無所，抱神以靜，形將自正，必靜必清。毋勞爾形，毋播爾精，毋狎爾性，息慮營營，乃可長生。”先生聞論，心花頓開，塵情冰釋，再拜稽首曰：“大仙之道，天地之道也。”轉拜宛邱。邱曰：“汝名在仙籍，執此操修，不日可到，何必多求。”因命二童送行。先生再拜辭別。二童送至迎所，相別而歸。